


INSPECCION PROVINCIAL DE
TRABAJO Y SEGURIDAD SOCIAL
OURENSE

14 JUL. 2017

REGISTRO

ENTRADANº E/32-001668/17



Confederación Intersindical Galega

www.galizacig.com

Á INSPECCIÓN DE TRABALLO E SEGURIDADE SOCIAL DE OURENSE

con domicilio aos efectos de notificación en Ourense, Parque de San Lázaro nº 12-4º andar, en representación da Confederación Intersindical Galega, dirixímonos á Inspección de Traballo e Seguridade Social de Ourense e, como mellor proceda en Dereito, **DICIMOS:**

Que a medio deste escrito vimos presentar denuncia, **en materia de prevención de riscos laborais**, contra a **Consellería Medio Ambiente e Ordenación do Territorio e a súa Xefatura Territorial en Ourense**, domiciliada na Avenida da Habana nº 79-5º andar, (Edificio Administrativo da Xunta de Galicia), denuncia que baseamos nos seguintes

FEITOS

Único.- A Consellería de Medio Ambiente e Ordenación do Territorio, é a titular e encargada da xestión pública do **Parque Natural do Invernadoiro**, localizado xeograficamente no Concello de Vilariño de Conso. Neste P.N. , integramente de xestión pública, presta servizos permanentemente persoal da Xunta de Galicia, e tamén acude a traballar outro persoal, mediante concesións, que desenvolve funcións de guías, monitores, traballos forestais de conservación e mantemento, etcétera. Neste contorno natural realízanse visitas públicas organizadas, actividades infantís relacionadas coa natureza, campamentos e un variado elenco de accións con participación de moitas persoas de todas as idades.

Pois ben, sendo un Parque Natural de aproximadamente 5.700 Has. de xestións pública, e que recibe multitude de visitas externas, non se respectan as medidas preventivas mínimas que garantan a seguridade, a saúde e a propia

vida das persoas que nel se encontran, ben sexan traballadores, ben sexan visitas externas.

Este incumprimento reflíctese nos seguintes feitos:

1. O P.N. do Invernadoiro non dispón, ou cando menos non se coñece da súa existencia, de Plano de Emerxencias e Evacuación.
2. O persoal asignado ao Parque non recibiu información nin protocolo algún das medidas que se deben adoptar no caso de ter que evacuar a unha persoa accidentada ou que necesite atención médica urgente.
3. En todo o emprazamento do Invernadoiro só se poden efectuar desprazamentos camiñando, estando estritamente restrinxido o uso de vehículos de motor só ao persoal encargado do seu mantemento e conservación, e iso unicamente en superficies moi delimitadas. Esta importante restrición, que xa de por si dificulta unha actuación rápida en caso de emerxencia, complica aínda mais a posible resposta dun persoal carente de información e formación en materia de emerxencias.
4. Desde 31-12-2016 no que se produciu o denominado “apagón analóxico” as preto de 6.000 hectáreas do P.N. están absolutamente incomunicadas. As emisoras que se utilizaban ata entón quedaron agora inservibles e os teléfonos móbiles que a Xunta lle facilita ao persoal non teñen cobertura en absolutamente ningún punto.
5. Esta importante carencia ten provocado situacións gravísimas, nas que persoas accidentadas non puideron ser atendidas nun centro hospitalario ata pasadas catro horas, o que, dependendo do tipo de accidente ou indisposición, puidera resultar moio danoso para a saúde das persoas ou mesmo chegar a ter consecuencias irreversibles.
6. A maquinaria que se usa para a conservación e mantemento (motoserras, desbrozadoras) non respectan as medidas de seguridade requiridas pola normativa e teñen máis de 15 anos de uso.
7. O persoal non recibe E.P.l.s adecuados ao seu cometido.
8. Nas instalacións do P.N. non existen botiquíns de primeiros auxilios, quedando restrinxidos só aos vehículos.
9. Compre que teñamos en conta que falamos dunha paraxe que está a bastante máis de 1 hora do centro hospitalario máis próximo e que recibe a

centos de visitantes. Dos últimos datos que coñecemos, nos nove primeiros meses de 2015 o P.N. do Invernadoiro recibiu 1.200 visitas e nel se instalaron varios campamentos de xente moza.

10. Denunciados estes incumprimentos o pasado 30 de maio por este sindicato, o único que recibimos da Xunta de Galicia foi unha resposta ambigua sen asunción de compromisos concretos, e no que a propia Administración recoñece que a Avaliación de Riscos existente data de xullo de 2009 e nin tan sequera contempla un plano de emerxencia e evacuación.

En base ao exposto, desa Inspección de Traballo e Seguridade Social **SOLICITAMOS:**

Que previas as comprobacións oportunas e necesarias, requiran á Consellería de Medio Ambiente e Ordenación do Territorio a que cumpra a normativa en materia de prevención de riscos laborais e actúe con absoluta inmediatez para corrixir as graves deficiencias aquí denunciadas.

Nin que dicir ten que, dada a gravidade dos feitos denunciados, e a posibilidade de que se poidan producir danos ás persoas, expresamente reclamamos celeridade e acción inmediata no traballo inspector.

Achegamos escrito dirixidos á consellería por parte da Delegada de Prevención da CIG, asinante desta denuncia.

Ourense, 14 de xullo de 2017